



29. januar 2010

UPA2010/151

Inatsisartut suleriaasianni § 36 imm. 2 naapertorlugu Naalakkersuisunut apeqqut imaattut matumuuna saqqummiupparput:

Naalakkersuisunut apeqqut:

- **Qaqortumi 1199 meterisut takitigisumik mittarfiliornissamik Naalakkersuisut pilersaaruteqarpat?**

(Inatsisartunut Siumup ilaasortai)

Tunngavilersuut:

Qaqortoq illoqarfiuvoq ineriartortoq, inuussutissarsiutitigut annertuumik periarfissaqarfiusoq. Taamaattumillu aamma illoqarfiup pitsaasunik angallannikkut atugassaqaqarnissaa pingaaruteqarpoq. Taamatut angallassinikkut annertusititsinissamat mittarfik periarfissaasinnaavoq. Aammattaaq nunap immikkoortuani atorsinnaasumik Qaqortumi mittarfiliornikkut Qaqortumiit Islandimut toqqaannartumik timmisartuussisoqarsinnaalersinnaavoq, tamannalu aamma takornariaqarnerup inuussutissarsiutigineqarneranut siuarsaataasinnaalluni.

Ukiut ingerlanerini Kujataani attaveqaatitigut misissueqqissaarinerit arlallit ingerlanneqartarput. Tamakkulu misissueqqissaarnerit nalunaarusiat Inatsisartunut agguaanneqartarlutik. Narsarsuarmi imarpik qulaallugu mittarfik Qaqortumut nuunneqassappat atuisut akiliuteqartillugit aningaasalersuisoqarsinnaanera aamma misissorneqarsimalluni.

Misissueqqissaarnerit tamakku Qaqortumi 1199 meterimik mittarfiliornissaq periarfissaqartoq takutippaat. Mittarfik 1199 meterisut takissuseqartoq timmisartunit Dash-7-init, nunatsinni illoqarfiit sinnerinut timmisartuussisartunit, aammalu 44-t tikillugit ilaasoqarsinnaasunit miffigineqarsinnaavoq. Taassuma saniatigut timmisartut Dash-8-t nutaanerusut mittarfimmu tassunga missinnaassapput.

Qaqortumi mittarfiliornissaq angallannertigut aningaasaqarnikkut maannakkut tunngavigineqartuni imminut akilersinnaassasoq ilisimavarput. Illoqarfik Qaqortutut angitigisoq (nunatsinnilu illoqarfinni kingulliit ilaattut) qulimiiguulimmiinnaq sullissinermik innersuunneqaannassappat attanneqarsinnaajunnaartoq Siumumi isumaqarpugut. Qaqortup inuussutissarsiutitigut ineriartornissaa tamatuma killilersorpa, tamanna aamma isumaliutigisanut ilaatinneqartariaqarpoq.

Ukiunilu kingullerni aatsitassarsiornikkut kujatani misissueqqissaarnerit takutippaat kujataani aatsitassarsiornermik iluaquteqalersinnaaneq qanittuarakasinnigortoq, engullu nukissiorfiliortoqarneratigut inuussutissarsiornikkut ineriartornissamat aatsaat taama periarfissarissaartigilerluni. Taamaattumik Qaqortumi mittarfimmik sanasoqarnissaa piffissanngorpoq.